


Vischnaunca da Medel/Lucmagn



**Lescha davart la recepziun da burgheis
per la vischnaunca da Medel/Lucmagn**

Art. 1 Principi

Daventar burgheis dalla vischnaunca da Medel/Lucmagn san burgheis grischuns e svizzers sco era personas digl'exteriur e personas senza naziunalitad, aschinavon che las premissas legalas tenor dretg federal, cantunal e communal ein dadas.

Art. 2 Premissas per personas jastras

¹ A **persunas jastras** sa vegnir garantiu il dretg da burgheis communal, sche talas han giu lur domicil duront silmeins tschun onns ella vischnaunca da Medel/Lucmagn. El mument dalla damonda sto la persuna esser domiciliada silmeins quater onns senza interrupziun en vischnaunca. Plinavon ha ella d'ademplier las ulteriuras pretensiuns tenor legislaziun federala e cantunala dil dretg da burgheis.

² Importa il temps da domicil en vischnaunca en tut dudisch onns, tonschan dus onns domicil senza interrupziun en vischnaunca el mument dall'inoltraziun dalla damonda.

Art. 3 Premissas per personas svizras

¹ **Persunas svizras** che han habitau duront silmeins tschun onns ella vischnaunca da Medel/Lucmagn, da quei ils davos treis onns senza interrupziun el mument dalla damonda, sa vegnir concediu ni garantiu il dretg da burgheis sche:

- a) gl'extract privat dil register penal svizzer cuntegn negin'inscripziun;
- b) adempleschan lur obligaziuns finanzialas;
- c) retilan neginas prestaziuns socialas;
- d) han restituiu eventuals susteniments socials dils davos diesch onns.

² Importa il temps da domicil en vischnaunca en tut dudisch onns, tonschan dus onns domicil senza interrupziun el mument dall'inoltraziun dalla damonda.

Art. 4 Procedura

¹ La damonda da naturalisaziun per **persunas svizras** sto vegnir fatga cul formular official e sto vegnir inoltrada culs suandonts documents alla vischnaunca:

- a) attests da domicil pil temps prescrets tenor lescha;
- b) attest dil stadi civil davart las datas registradas dil stadi civil;
- c) extract privat dil register penal svizzer;
- d) cuors dalla veta;
- e) extracts dils registers da scussiun dallas vischnauncas da domicil dils davos diesch onns;
- f) attestaziun dallas autoritads fiscalas davart il pagament dallas taglias taxadas;
- g) informaziuns officialas davart eventualas retratgas d'agid social dallas vischnauncas da domicil dils davos diesch onns;
- h) cumprova d'haver la tgira genituriala, aschilunsch che quella vegn buca exequida comunablamein dils geniturs.

² El cass da naturalisaziuns privilegiadas sto vegnir aschuntau ils documents che documenteschan il causal respectiv.

³ Ils documents astgan per regla buca esser pli vegls che sis meins.

⁴ La damonda da naturalisaziun per **persunas jastras** sto vegnir fatga cul formular official e sto vegnir inoltrada culs documents necessaris agl uffeci cantunal.

Art. 5 Examinaziun e decisiun

¹ La suprastonza communal examinescha las pretensiuns e fa ils sclariments necessaris.

² La suprastonza envida las **persunas jastras** che fan ina damonda da naturalisaziun ad in discuors da qualificaziun, el qual surtut l'integraziun e las enconuschientschas previdas tenor legislaziun federala e cantunala dil dretg da burgheis vegnan examinadas. Fa ei basegns sa era in discuors cun persunas svizras haver liug.

Art. 6 Burgheis d'honor

¹ A persunas ch'ein sefatgas specialmein meriteivlas per la publicitad ni pil beinstar public sa vegnir concediu il dretg da burgheis d'honor.

² La surdada dil dretg da burgheis d'honor ei buca ligiada vid las premissas da domicil da questa lescha.

³ El sa haver il medem effect sco il dretg da burgheis obtenius entras la procedura ordinaria entras naturalisaziun. Per persunas svizras senza dretg da burgheis cantunal sco era a persunas digl exteriur ein las premissas tenor legislaziun federala e cantunala dil dretg da burgheis necessarias.

Art. 7 Taxas

¹ Per decisiuns ella procedura da naturalisaziun vegnan taxas che cuvieran ils cuosts incassadas. Las taxas muntan maximalmein fr. 2'000.— per persunas jastras e fr. 1'000.— per persunas svizras.

² La suprastonza communal sa decider per Svizzers e per persunas digl exteriur differentas pauschalas per cass. Per naturalisaziuns privilegiadas san pauschalas pli bassas vegnir fixadas. Las pauschalas ein d'adattar periodicamein allas expensas effectivas.

³ La suprastonza sa reducir ni relaschar las taxas per persunas minorenas, las qualas vegnan buca naturalisadas ensemen culs geniturs, per persunas en formaziun ni per acziuns.

⁴ Sch'ei vegn concediu il dretg da burgheis d'honor vegn ei desistiu d'ina taxa.

⁵ Per la lavuraziun dallas damondas da naturalisaziun sa in pagament anticipau da cuosts vegnir incassaus.

Art. 8 Cumpetenzza e communicaziun

¹ L'execuziun da questa lescha schai ella responsablada dalla suprastanza communal.

² Ella communicescha la decisiun d'ina damonda da naturalisaziun a scret. Decisiuns negativas ein d'argumentar.

³ Sch'il petent havess d'haver obteniu il dretg da burgheis entras indicaziuns nunverdeivlas ni entras zuppar fatgs decisivs, rapporta la suprastanza communal quei al cantun entochen sil pli tard 8 onns suenter ch'igl ei vegniu dau il dretg da burgheis.

Art.9 Vigur legala

Posseda il petent buca il dretg burgheis dil cantun Grischun va la naturalisaziun en vigur pér suenter la recepziun sco burgheis cantunal.

Art.10 Mieds legals

Encunter decisiuns e disposiziuns dalla suprastanza communal sa vegnir recurriu enteifer 30 dis suenter la communicaziun tier la Dertgira administrativa dil cantun Grischun.

Art.11 Relaschada

La relaschada dil dretg da burgheis dalla vischnaunca da Medel/Lucmagn sedrezza tenor ils art. 20 e 21 dalla lescha cantunala dil dretg burgheis (DG 130.100).

Art. 12 Abrogaziun e vigur

¹ Questa lescha remplazza la lescha da recepziun da burgheis per la vischnaunca da Medel/Lucmagn dils 14 da december 2006.

² Questa lescha passa en vigur cull'approbaziun entras la radunonza communal dils 5 d'avrel 2018.

Il president communal:

Il canzlist communal:

Peter Binz

Valentin Pally